

## ***Asal Usul Orang Asli: Antara Fakta dan Fiktif***

oleh  
**HAMID MOHD ISA\***

### **Abstrak**

Secara umum Orang Asli dipercayai merupakan penduduk terawal mendiami Semenanjung Tanah Melayu selepas zaman prasejarah. Teori asal usul masyarakat ini adalah berdasarkan sumber sejarah, antropologi budaya, arkeologi dan antropologi fizikal namun tidak kurang bersifat fiktif dan persepsi. Hingga kini terdapat banyak kekaburan tentang asal usul mereka dan sejauhmana nenek moyang mereka boleh dikaitkan dengan masyarakat prasejarah, hubungan antara etnik malah kaitan mereka dengan masyarakat Melayu. Beberapa sarjana memberikan hipotesis tentang asal usul namun tiada satu pun menemui jawapan yang tepat. Mutakhir ini persoalan ini cuba dijawab melalui kajian mtDNA meskipun jawapan yang di berikan agak kompleks dan masih tidak menemui jawapan yang tepat. Berdasarkan data-data arkeologi, antropologi dan sejarah dari kajian-kajian terdahulu, makalah ini akan membincangkan tentang asal usul Orang Asli ini dengan harapan perbincangan ini akan membuka ruang kepada kajian seterusnya.

**Kata kunci:** Orang asli, zaman prasejarah, mtDNA.

### **Definisi Orang Asli**

Dalam bahasa Melayu, Orang Asli bermaksud orang asal atau yang mula-

---

\* Penulis merupakan penyelidik dan pensyarah di Pusat Penyelidikan Arkeologi Global, USM.

mula. Ia dipetik dari bahasa Arab *asali* bermaksud asli (Carey 1976). Istilah ini telah diterima meskipun dipertikaikan maknanya dari sudut bahasa Melayu dimana mengikut Kamus Dewan 'asli' bermaksud yang tulen dan bukan palsu. Istilah Orang Asli ini mula digunakan oleh pentadbir untuk menyeragamkan 18 sub-etnik dari tiga kumpulan utama masyarakat Orang Asli di Semenanjung Tanah Melayu. Untuk memudahkan pentadbiran ia dibahagikan kepada 3 kumpulan utama iaitu Negrito, Senoi dan Melayu Proto.

Secara etnografi, sejarah dan linguistik, pembahagian ini perlu dikaji semula kerana Melayu Proto sebenarnya adalah Melayu dan secara antropologi, sejarah dan linguistik tidak sesuai dikategorikan sebagai Orang Asli. Melayu Proto yang terdiri dari Orang Kuala, Orang Kanak, Orang Seletar, Temuan, Semelai, Jakun bukan dari rumpun *Austroasiatic Mon Khmer* seperti Senoi dan Negrito tetapi berasal dari rumpun *Austronesia* sama seperti rumpun Melayu lain di Nusantara<sup>1</sup>. Masyarakat ini adalah penutur *Malayo Polinesia* satu cabang dari Austronesia, sama seperti majoriti orang Melayu di Semenanjung Tanah Melayu, Sumatera, Selatan Thailand, Patani, kepulauan Filipina, Borneo dan kepulauan Indonesia dan sebagainya. Selain faktor linguistik, terdapat banyak persamaan di antara masyarakat ini dengan rumpun Melayu. Sebagai contoh tentang terdapatnya persamaan adat yang diamalkan masyarakat Temuan dengan masyarakat Melayu yang mengamalkan adat perpatih. Begitu juga dari aspek struktur sosial di mana terdapat persamaan gelaran jawatan dalam struktur kepimpinan dalam masyarakat Orang Laut seperti gelaran Jenang, Menteri, Jugrah, dan sebagainya yang mempunyai persamaan dengan gelaran dalam masyarakat Melayu.

Contohnya Orang Laut, salah satu etnik dalam kumpulan Melayu Proto (Kanak, Seletar dan Orang Kuala) mempunyai hubungan yang akrab dengan alam Melayu, contohnya pada zaman Srivijaya, zaman Kesultanan Melaka hingga kepada Kerajaan Johor (Andaya 1987; Wolters 1967). Wolters (1967) menyatakan faktor utama kekuatan Srivijaya disebabkan hubungan yang terjalin antara pemerintah dengan Orang Laut ini. Beliau menjelaskan lagi bahawa penguasaan dan kawalan terhadap masyarakat Orang Laut ini adalah begitu penting bagi menjamin kemakmuran Srivijaya di kepulauan Alam Melayu (Wolters 1967). Hubungan yang terbina antara Orang Laut dengan Parameswara ini dapat dilihat melalui upacara *abhiseka* di Palembang pada tahun 1391-1392.

Selain itu, Orang Kuala contohnya kurang senang dengan gelaran Orang Asli ini. Menurut mereka, cara hidup amat berbeza dengan Orang Asli contohnya

---

1 Nusantara merujuk kawasan penutur bahasa Malayo-Polnesia salah satu cabang dalam rumpun Austronesia di antaranya kepulauan Indonesia, Borneo, kepulauan Filipina, Semenanjung Tanah Melayu termasuk Selatan Thailand dan serta taburan masyarakat Champa di Vietnam dan Kemboja. Austronesia merupakan satu rumpun diaspora meliputi kawasan yang amat luas, dari Madagascar di barat ke kepulauan Easter di timur, dari Taiwan ke Micronesia ke utara dan New Zealand di selatan. Ia merangkumi 1000-1200 bahasa dan dialek melibatkan kira-kira 300 juta manusia (Simanjuntak *et al* 2006).



keturunan mereka telah lama memeluk Islam jika dibandingkan dengan masyarakat Orang Asli yang lain. Bahkan daripada pemerhatian yang dilakukan, masyarakat Orang Kuala ini berusaha mengubah persepsi masyarakat luar yang mengatakan bahawa mereka merupakan sebahagian dari Orang Asli. Perkara ini dapat dilihat apabila mereka mendakwa mempunyai hubungan pertalian darah dengan golongan ulamak yang terkenal di kawasan Riau. Mereka berpendapat bahawa pelabelan Orang Asli ke atas diri mereka adalah kurang relevan kerana mereka tidak membela anjing dan memakan babi seperti masyarakat Orang Asli yang lain (Hamid & Amir 2011). Malah pada tahun 1955 Orang Duano atau Orang Kuala (salah satu etnik Orang Laut) pernah memohon status Melayu kerana mereka sememangnya Melayu dan beragama Islam (Tomadan 1976). Justeru itu, menurut mereka adalah tidak wajar kelompok masyarakat mereka ini digolongkan dalam kelompok masyarakat Orang Asli.

Sebelum tahun 1960 istilah Orang Asli belum wujud. Mereka dipanggil dalam pelbagai gelaran seperti *Sakai*, *Jakun*, *Semang*, *Orang Hulu*, *Orang Hutan*, *Orang Darat*, *Orang Dalam*, *Pangan* dan *Orang Liar* (Carey 1976). Kebanyakan nama ini mempunyai konotasi yang negatif contohnya *Sakai* bermaksud hamba dan kekeliruan juga timbul disebabkan ia juga merujuk kepada kumpulan Senoi di Malaysia dan kumpulan Negrito di Selatan Thailand dan satu kumpulan masyarakat terasing di Riau Indonesia. Istilah *Semang* pula kemungkinan berasal dari perkataan *Siamang* (*Symphalangus syndactylus*) iaitu sejenis beruk. Istilah *Semang* dan *Sakai* ini digunakan secara meluas oleh para antropologi barat pada zaman pra merdeka (malah masih digunakan hingga kini). Mereka merujuk semua Negrito sebagai *Semang* dan semua Senoi sebagai *Sakai*. *Pangan* pula di gunakan merujuk kepada kumpulan Negrito di pantai timur Semenanjung Tanah Melayu, menurut Skeat & Blagden (1966) ia bermaksud *People of the forest glades*.

Orang Melayu di Pahang memanggil mereka *Pangan Tanah*. Ia mungkin juga berasal dari perkataan *Pagan* yang digunakan oleh ahli antropologi untuk merujuk mereka yang tiada agama (Skeat & Blagden 1966). Pentadbir Inggeris pula menggunakan istilah *aborigines* bagi merujuk semua Orang Asli termasuk peribumi di Australia. Malah ada yang memanggil mereka sebagai *Dwarf Peoples* (Schebesta 1928) dan juga *Pygmies* oleh sesetengah penulis barat. Penggunaan istilah ini juga mempunyai konotasi yang negatif yang membawa maksud manusia kerdil atau mempunyai tahap pemikiran yang primitif.

### **Masyarakat Negrito lain di dunia**

Selain di Semenanjung Tanah Melayu terdapat beberapa kumpulan Negrito berada di kawasan lain Asia Tenggara seperti Aeta di Filipina, Sakai, Tongga atau Mos di selatan Thailand dan Jarawa di kepulauan Andaman di Laut Andaman. Secara antropologi mereka mempunyai persamaan dan tergolong dalam kumpulan Negrito. Terdapat beberapa puak yang tinggal di Selatan Thailand ini dengan



populasi dianggarkan hanya seramai 300 orang (Chaowanakit & Chanthachon 2009). Mereka tinggal di wilayah Trang, Krabi, Chumporn, Patallung dan Satun di Selatan Thailand (Pookarjorn 1994). Berdasarkan pemerhatian di kawasan penempatan Jahai di hutan Belum - Temenggor dan Jeli Kelantan mendapati antara mereka mempunyai hubungan sejarah yang panjang. Malah penulis pernah menemui sekumpulan Negrito dari selatan Thailand berada di Kampong Charok Bus di Temenggor pada tahun 2006. Selain itu Orang Aeta atau juga dipanggil Agta, Ati atau Ita (Garvan 1963) adalah keturunan Negrito atau Semang yang sama seperti yang terdapat di Semenanjung Malaysia dan Selatan Thailand. Mereka juga dikenali sebagai Baluga, Pugut atau Pugot dikalangan orang Filipina. Pada sekitar tahun 1990, populasi mereka dianggarkan seramai kira-kira 30,000-20,000 orang dan tinggal di kawasan hutan pergunungan di Luzon. Di percayai merupakan penduduk awal di Filipina mendahului kedatangan masyarakat Austronesia lain yang dianggarkan sejak 30,000 tahun dahulu. Negrito juga terdapat di kepulauan Andaman yang terletak di Laut Andaman bersempadan dengan Laut Bengal, secara pentadbiran kepulauan ini diiktiraf sebagai wilayah India. Mereka dikenali sebagai masyarakat Jarawa dan berdasarkan cara hidup dan teknologi dipercayai adalah keturunan masyarakat Paleolitik yang telah berada di Andaman sejak 60,000-30,000 tahun dahulu.

## Demografi

Populasi Orang Asli di Semenanjung Malaysia dalam tahun 2010 ialah seramai 178,197 orang (JAKOA 2012). Dari sudut perlembagaan Malaysia perkara-perkara yang berkaitan dengan Orang Asli adalah termaktub di dalam Undang-Undang Malaysia Akta 134. Terdapat 18 sub kumpulan kecil Orang Asli yang berbeza dari aspek budaya dan bahasa yang tergolong dalam tiga kumpulan utama Negrito, Senoi dan Melayu Proto (Jadual 1). Sub kumpulan yang paling ramai ialah Semai, diikuti Temiar, Jakun dan Temuan. Secara demografi, Negrito tinggal di kawasan utara Semenanjung Malaysia bersempadan dengan Thailand iaitu di Hulu Perak, Baling Kedah, Ulu Kelantan, kawasan Kuala Tahan, Pahang dan Ulu Terengganu (Rajah 1). Ahli antropologi barat memanggil mereka *Northern Aslian* (Benjamin 2001). Senoi pula tertumpu di kawasan tengah (beradaptasi di kawasan berbukit) termasuk di Perak, Kelantan, Pahang dan Selangor, mereka dikenali sebagai *Central Aslian*. Melayu Proto pula tertumpu di selatan iaitu di kawasan pantai di Johor, mereka juga dikenali sebagai *Southern Aslian* (Benjamin 2001).

Carey (1968) pula membuat klasifikasi Orang Asli mengikut corak penempatan mereka. Kumpulan pertama ialah komuniti hutan iaitu yang tinggal jauh di dalam hutan dan sukar dihubungi serta tidak mengalami perubahan. Kumpulan kedua ialah komuniti pinggir iaitu yang tinggal berhampiran jalan raya dan mudah dihubungi serta menjalin hubungan dengan masyarakat Melayu serta Cina. Kumpulan ketiga ialah komuniti yang tinggal berhampiran kampung Melayu, mudah



dihubungi dan mudah menerima arus pembangunan. Kumpulan keempat ialah komuniti yang telah berasimilasi dalam masyarakat Melayu contohnya Melayu Proto di Johor.

**Jadual 1: Kensus Orang Asli Semenanjung Malaysia**  
*Sumber: JAKOA (2012)*

| Kumpulan     | Sub-kumpulan  | Populasi | Penempatan                                                  |
|--------------|---------------|----------|-------------------------------------------------------------|
| Negrito      | Kintak        | 194      | Hulu Perak                                                  |
|              | Lanoh         | 402      | Hulu Perak                                                  |
|              | Bateq         | 1447     | Ulu Kelantan/Ulu Tembeling /Ulu Terenganu                   |
|              | Mendriq       | 362      | Hulu Kelantan                                               |
|              | Jahai         | 2387     | Hulu Perak/Jeli Kelantan                                    |
|              | Kensiu        | 237      | Baling Kedah                                                |
| Senoï        | Temiar        | 31038    | Ulu Perak/Batang Padang/Kinta /Hulu Kelantan                |
|              | Semai         | 51437    | Kinta /Batang Padang/Parit/Kuala Lipis/<br>Cameron Highland |
|              | Semoq Beri    | 2348     | Kelantan/Ulu Terengganu                                     |
|              | Jah Hut       | 5618     | Jerantut/Temerloh                                           |
|              | Mah Meri      | 3799     | Banting Selangor                                            |
|              | Che Wong      | 651      | Raub/Lancang/Temerloh Pahang                                |
| Melayu Proto | Temuan        | 27590    | Ledang/Negeri Sembilan/Ulu Langat                           |
|              | Semelai       | 7727     | Tasek Bera Pahang                                           |
|              | Jakun         | 34722    | Kota Tinggi /Batu Pahat/Muazam Shah,                        |
|              | Orang Kanak   | 148      | Kota Tinggi Johor                                           |
|              | Orang Kuala   | 3525     | Batu Pahat/Kota Tinggi/Pontian                              |
|              | Orang Seletar | 1620     | Johor Bharu                                                 |
| Jumlah       |               | 178217   |                                                             |

Pada pertengahan abad ke-19, pihak British yang menubuhkan Negeri-Negeri Selat telah mula menunjukkan minat terhadap Orang Asli. Dalam tahun 1901 Captain G.B Cerruti dilantik sebagai *Superintendent of the Sakais* yang bertujuan menjaga kepentingan Orang Asli. Dalam tahun 1939 H.D Noone<sup>2</sup> seorang *Field*

2 Noone telah berkahwin dengan seorang gadis Temiar yang jelita di Hulu Perak bernama Anjang dalam tahun 1935, Noone telah hilang secara misteri dan kehilangannya hanya terbongkar apabila adiknya Richard Noone datang mencarinya (Wan Hashim 1993). Terdapat beberapa teori kehilangannya, ada yang mengatakan ia diculik dan dibunuh komunis, ada yang mengatakan



*Ethnographer* di Muzium Perak, Taiping pula dilantik sebagai *Protector of Aborigines* (Endicott & Dentan 2004) (Foto 1). Semasa Darurat (1948), akibat tekanan dari pihak kerajaan, komunis menjadikan Orang Asli sebagai sasaran untuk mendapatkan makanan. Bagi memastikan Orang Asli tidak terpengaruh dan untuk melumpuhkan aktiviti komunis pihak kerajaan mengambil langkah mewujudkan Rancangan Penempatan Semula bagi Orang Asli.

Kerajaan kemudian menubuhkan Jabatan Orang Asli (JOA) kemudiannya dikenali sebagai Jabatan Hal Ehwal Orang Asli (JHEOA) diikuti dengan Jabatan Kemajuan Orang Asli (JAKOA). Penubuhan Jabatan Orang Asli juga seiring dengan wujudnya Akta 134 Akta Orang Asli 1954 untuk melindungi Orang Asli. Akta ini telah pun telah dipinda kali terakhir pada tahun 1967 dan disemak pada tahun 1974. Terdapat beberapa isu yang memerlukan semakan semula akta ini, antaranya isu melibatkan tanah Orang Asli yang di bawa ke mahkamah yang sepatutnya memberi keuntungan kepada kedua-dua pihak, isu pemberian hak milik tanah, isu takrifan Orang Asli dan isu harta pusaka (<http://www.jakoa.gov.my>). Beberapa rancangan pembangunan diwujudkan untuk membangunkan taraf ekonomi, pendidikan dan kesihatan. Projek pembangunan utama ialah Rancangan Pengumpulan Semula (RPS)<sup>3</sup> iaitu menyediakan rumah dan menyatukan beberapa perkampungan Orang Asli di kawasan terpencil di sebuah penempatan besar bagi memudahkan pihak kerajaan menyalurkan bantuan dan pembangunan.

Projek RPS ini telah mula dilaksanakan sejak 1980 di bawah Rancangan Malaysia Ke-4 dengan tujuan asal untuk membendung Orang Asli dari pengaruh komunis. Sebanyak 17 lokasi dipilih iaitu 6 di Perak, 7 di Pahang, 3 di Kelantan dan 1 di Johor. Antara pembangunan yang dilaksanakan ialah menyediakan rumah kediaman, penyediaan prasarana asas bersepadu serta penanaman getah dan kelapa sawit secara komersil. Projek kedua ialah Penyusunan Semula Kampung (PSK) yang telah bermula sejak 1999, di bawah Rancangan Malaysia Ke-7. Projek ini bertujuan untuk menaik taraf prasarana dan pembangunan tanah melibatkan tanaman kelapa sawit dan getah.


Projek Penyusunan Semula Kampung ini melibatkan 217 kampung mengandungi 12,264 keluarga (<http://www.jakoa.gov.my>). Rancangan pembangunan ini ternyata membawa banyak perubahan sosio-ekonomi dalam masyarakat Orang Asli meskipun masih terdapat banyak ruang untuk diperbaiki. Selain itu, projek pembangunan ini dikenali sebagai Rancangan Kampung Baru (RKB)

---

dia mati dibunuh harimau dan ada juga teori yang mengaitkan kehilangannya dengan mereka yang cemburu selepas perkahwinannya dengan Anjang (Temubual Serdang Bin Uda, 60 tahun, Penghulu Sungai Tekam, Temenggor, 2 Julai 2010).

3 Menurut Carey (1979) terdapat kekeliruan tafsiran antara Penempatan Semula (*Resettlement*) dan Penyusunan Semula (*Regroupment*). Penempatan Semula memberi maksud menempatkan Orang Asli dari beberapa Kampung terpencil kesatu kawasan baru. Penyusunan Semula pula bermaksud menyediakan penempatan dan pembangunan secara in-situ iaitu tanpa merubah cara hidup dan sekitaran.





**Rajah 1:** Peta Taburan Orang Asli mengikut etnik di Semenanjung Malaysia

Sumber: selepas Benjamin (2001).

juga dilaksanakan. Projek ini melibatkan pembukaan kampung baru di kawasan keselamatan sempadan Malaysia Thailand (KESBAN) seperti RPS dan PSK. Projek RKB juga bertujuan untuk melaksanakan pembangunan, menyediakan kemudahan asas dan kebajikan masyarakat Orang Asli (<http://www.jakoa.gov.my>).

Orang Asli juga mempunyai beberapa pertubuhan yang ditubuhkan sebagai wadah untuk memperjuangkan dan melindungi hak-hak mereka, antaranya ialah pertubuhan yang terbesar iaitu Persatuan Orang Asli Semenanjung Malaysia (POASM). Ia telah ditubuhkan dalam tahun 1976 dan hingga kini mempunyai keahlian sekitar 22,521 orang (<http://www.temiar.com/poasm.html>). Selain itu, seorang Senator dilantik dalam kalangan Orang Asli untuk menjadi wakil mereka di Parlimen.



*Foto 1: Noone,  
Ethnographer and  
Protector of Aborigines,  
1939*

*Sumber: Muzium Perak,  
Taiping*

### **Teori Asal Usul Orang Asli**

Tidak ada bukti yang tepat untuk menghuraikan asal usul dan sejak bila masyarakat Orang Asli mula mendiami Semenanjung Tanah Melayu. Meskipun secara umumnya masyarakat ini dikatakan penduduk asal mendiami Semenanjung sebelum orang Melayu. Terdapat beberapa pandangan sarjana tentang asal usul Orang Asli. Solheim (1980), mencadangkan terdapat tiga gelombang migrasi ke Semenanjung Tanah Melayu. Pertama migrasi Negrito, di ikuti Senoi dan disusuli Melayu Proto. Bellwood (1997) pula berpandangan masyarakat Semang (Negrito)



adalah berasal dari masyarakat zaman *Hoabinhian*<sup>4</sup> sekitar 10,000 hingga 4,000 tahun dahulu, manakala Senoi berasal dari masyarakat petani yang bermigrasi dari Selatan Tengah Thailand ke utara Semenanjung Tanah Melayu sejak 4,000 tahun dahulu. Masyarakat ini membawa bersama mereka teknologi tembikar, beliung bergilap dan artifak Neolitik lain yang dipercayai berasal dari budaya Ban Kao<sup>5</sup>. Hipotesis ini tidak mempunyai sebarang bukti kukuh, tidak ada sebarang bukti menunjukkan wujud hubungan antara masyarakat Hoabinhian (atau masyarakat Paleolitik) dengan Negrito begitu juga masyarakat Ban Kao dengan Senoi kecuali bersandarkan persamaan budaya memburu memungut dalam kedua masyarakat tersebut sebagai satu corak pengeluaran. Begitu juga secara perbandingan antara masyarakat Ban Kao dengan Senoi, memang terdapat persamaan corak pertanian berasaskan padi bukit, namun tiada bukti menunjukkan masyarakat Senoi mempunyai pengetahuan membuat tembikar yang boleh mengaitkan mereka dengan masyarakat Ban Kao.

Solheim (1980) pula berpandangan bahawa kebudayaan Neolitik telah diperkenalkan oleh pedagang maritim. Menurut beliau, masyarakat *Mongoloid* telah sampai di Pantai Timur Tanah Melayu beberapa millennia dalam kumpulan-kumpulan kecil. Solheim berhipotesis bahawa kumpulan kecil ini kemungkinan adalah masyarakat Senoi ini. Selain itu, masyarakat pesisir *Hoabinhian* pula, menurut Solheim, adalah masyarakat yang mendiami kawasan tapak timbunan cengkerang di Guar Kepah<sup>6</sup>, dan selepas itu berhijrah ke kawasan pendalaman melalui reduksi ukuran tubuh dalam tempoh beberapa millennia dan dikenali sebagai Semang (Negrito). Masyarakat *Hoabinhian* lain, yang telah menetap di bahagian pendalaman kawasan banjaran, mengadaptasikan diri dengan budaya Neolitik disebabkan hubungan dengan pedagang selain berlaku proses perkahwinan campur dan terserap menjadi masyarakat Senoi.

Rambo (1979) bagaimanapun, tidak bersetuju bahawa populasi Semang (Negrito) dan Senoi tertumpu di bahagian pesisir dan berlakunya perbezaan *somatotypic* adalah kesan dari perbezaan sekitaran adaptasi. Menurut beliau, keturunan Senoi adalah yang pertama berhijrah secara langsung ke kawasan *hinterland*, dan beradaptasi di kawasan tanah tinggi dan mengamalkan *shifting*

---

4 Hoabinhian merujuk kepada zaman Mesolitik di Asia Tenggara yang bercirikan alat batu bifas dan unifas, bagaimanapun, di Malaysia istilah ini tidak sesuai dirujuk mewakili satu zaman berdasarkan alat tersebut telah ditemui di tapak-tapak Paleolitik seperti Kota Tampan, Bukit Jawa, Temelong dan Bukit Bunuh

5 Ban Kao ialah sebuah tapak arkeologi di bahagian tengah Thailand yang signifikan sebagai kawasan pengeluar pelbagai tembikar termasuk tembikarberkaki tiga yang juga ditemui di beberapa tapak di Malaysia seperti Koadiang, dan Jenderam Hilir.

6 Gua Kepah terletak di Seberang Perai Pulau Pinang, tapak ini telah ditemui oleh G. W Earl pada tahun 1860. Ekskavasi terbaru oleh Pusat Penyelidikan Arkeologi Global, Universiti Sains Malaysia telah menemukan bukti tapak ini telah dihuni oleh masyarakat pesisir Neolitik sejak 5,000-6,000 tahun dahulu (Mokhtar 2012).



*horticulture*<sup>7</sup> sejak 10 ribu tahun dahulu. Keturunan Semang pula, dipercayai telah berhijrah ke kawasan hutan hujan tropika tanah rendah sejak beberapa millennia. Bulbeck (1996) pula menjelaskan ukuran tubuh yang kecil, kulit yang hitam dan rambut yang keriting masyarakat Semang (Negrito) adalah disebabkan adaptasi di hutan hujan tropika. Senario evolusi masyarakat *hinterland* berlangsung sejak *Hoabinhian* ke Neolitik hingga ke zaman etnografi begitu juga bagi Asia Tenggara

Teori Solheim mungkin ada logiknya, namun memerlukan bukti yang lebih kukuh. Ini kerana berdasarkan catatan Anderson (1824), sekitar sebelum tahun 1910-an memang terdapat beberapa kumpulan kecil Negrito yang tinggal di kawasan pesisir berhampiran kampung Melayu seperti di Yan Kedah, di Seberang Perai dan Juru, Pulau Pinang, Beruas dan dikawasan Matang Taiping. Namun selepas tempoh tersebut tiada lagi rekod menunjukkan ada masyarakat Negrito di kawasan ini melainkan semuanya berada di pendalaman. Besar kemungkinan mereka telah berhijrah apabila berlaku pembukaan kawasan pertanian oleh masyarakat petani *Austronesia* (Melayu) ke kawasan pesisir. Selain itu, penghijrahan ini juga disebabkan penglibatan mereka sebagai pemungut hasil hutan.

Selain itu beberapa kajian genetik mtDNA<sup>8</sup> telah dilakukan untuk menentukan ras Orang Asli dan hubungannya dengan masyarakat prasejarah. Oppenheimer (2003;2005) telah menjalankan analisis mtDNA terhadap beberapa kumpulan Orang Asli. Hasil kajian beliau mencadangkan bahawa genetik Negrito mempunyai percampuran genetik paling sedikit dengan orang luar di Asia Tenggara (kecuali terdapat sedikit percampuran dengan Senoi dan Melayu Proto). Dua lagi genetik Orang Asli iaitu Senoi berasal dari Indocina dan Melayu Proto pula mempunyai percampuran yang banyak dengan masyarakat Melayu tempatan. Oppenheimer (2005) bersetuju dengan pandangan Bullbeck (1996), bahawa Senoi berada diantara Negrito dan Melayu Proto dan telah mewujudkan teori percampuran Neolitik Mongoloid.

Menurut Oppenheimer (2005) hubungan antara Orang Asli dengan masyarakat awal prasejarah mempunyai jarak yang jauh dan sukar untuk dikaitkan, kajian yang lebih jelas hanya boleh dilakukan melalui perbandingan mtDNA Orang Asli dengan rangka manusia prasejarah. Menurut Oppenheimer (2011), ketiga-tiga kumpulan Orang Asli mempunyai keturunan tempatan yang unik dan kemungkinan berasal dari penghijrah pertama manusia moden dari Afrika. Berdasarkan morfologi gigi, Oppenheimer (2011) mencadangkan ketiga-tiga kumpulan mempunyai morfologi gigi jenis *Sundadont* Asia Tenggara dengan Negrito paling hampir menyerupai masyarakat Afrika dan Eropah. Bukti gigi dan genetik ini juga menyangkal teori asal-usul Melayu dari Taiwan, sebaliknya menunjukkan penduduk arus perdana Asia Tenggara adalah asal usul kepada kaum Cina dan masyarakat Asia Timur.

7 Pertanian pindah adalah berasaskan pertanian saradiri, biasanya melibatkan tanaman padi bukit atau padi huma, ubi kayu, keledek dan sebagainya.

8 *Mitochondrial Deoxyribo Nucleic Acid*, kajian saintifik untuk mengetahui asal usul genetik atau keturunan.



Bukti yang dianggap paling boleh di terima yang menyokong teori asal usul masyarakat Senoi berasal dari rumpun mongoloid ialah dari aspek linguistik. Bahasa mereka yang diklasifikasikan sebagai Aslian Austroasiatic Mon Khmer, rumpun yang sama dengan kebanyakan masyarakat di kawasan Indocina, Tibet dari keluarga Austroasiatic Mon Khmer (Diffloth 1979; Benjamin 2001). Yang kedua ialah corak pertanian shifting atau swidden cultivation, khususnya penanaman padi huma atau padi bukit yang menyamai masyarakat Neolitik dan banyak diamalkan masyarakat *Hill Tribes* di Thailand dan Myanmar. Namun persoalannya ialah masyarakat Negrito meskipun mempunyai ciri-ciri fisiologi Afrika atau Australian Aborigines (yang memperkukuhkan teori keturunan Hoabinhian atau Paleolitik), namun bertutur bahasa dari rumpun yang sama dengan masyarakat Senoi.

## Penutup

Kesimpulannya amat sukar untuk menentukan asal usul Orang Asli secara mutlak. Namun berdasarkan bukti-bukti arkeologi, sejarah, etnografi dan MtDNA, besar kemungkinan dalam masyarakat Orang Asli terdapat pelbagai campuran antara genetik sama ada Negrito, Senoi dan Melayu Proto, malah kajian MtDNA oleh Oppenheimer (2010) (Foto 2) dikalangan Orang Asli juga menunjukkan terdapat campuran genetik antara genetik Orang Asli dengan Melayu tempatan. Keadaan ini dipercayai telah berlangsung akibat proses adaptasi dan kahwin campur di antara kumpulan tersebut yang berlangsung dalam tempoh yang panjang. Malah dalam catatan sejarah terdapat banyak bukti tentang perkahwinan antara orang Melayu dengan Orang Asli, antaranya Nakhoda Kasim seorang pembesar Melayu di Perak pada abad ke 16 yang berkahwin dengan anak seorang ketua puak Negrito (Maxwell 1881; Evans 1937).



**Foto 2:** Oppenheimer dua dari kiri di Kampung Air Bah dalam tahun 2009  
Sumber: Pusat Penyelidikan Arkeologi Global



## Bibliografi

- Andaya, L.Y. 1987. Kerajaan Johor 1641-1728: Pembangunan Ekonomi dan Politik, Kuala Lumpur: Dewan Bahasa dan Pustaka.
- Anderson, J. 1824. *Political and Commercial Considerations Relatives to the Malayan Peninsula And British Settlement in the Straits of Malacca*. With the Appendix: the Aboriginal Inhabitants of the Malayan Peninsula, and particularly the Negroes called Semang, Prince of Wales Island.
- Bellwood, P. (1997). *Prehistory of Indo-Malaysian Archipelago*. Revised Edition, University Of Hawaii, Honolulu.
- Benjamin, G., 2001. Orang Asli Language: From Heritage to Death? In: Razha Rashid and Wazir Jahan Karim (eds.) *Minority Cultures of Peninsular Malaysia Survivals of Indigeneous Heritage*. Pulau Pinang: Academy of Sosial Science AKSASS.
- Bulbeck, D. 1996. Holocene Biological Evolution Of The Malay Peninsula Aborigines Orang Asli, Centre for Archaeology, The University of Western Australia, Nedlands, Australia.
- Carey, I. 1968, The Orang Asli And Social Change, *Federation Museum Journal*, Vol. XIII, Museums Department, Kuala Lumpur.
- Carey, I. 1979. The Resettlement of The Orang Asli From The Historical Perspectives, *Federation Museums Journal*. 24. Museums Department Kuala Lumpur.
- Chaowankit, A. & Chanthachon, S. 2009. The Ethnic Manni Sakai: Guidelines for Social and Cultural Revival for Living Together in Southern Thailand, *The Social Sciences*, Volume 4.
- Dentan, R. & Endicott, K. 2004. Into The Mainstream Or Into The Backwater: Malaysian Assimilation Of Orang Asli In Legislating Modernity, IN C. Duncan, *et.al.* (eds.) Cornell University Press.
- Diffloth, G. 1979. Aslian Language And Southeast Asian Prehistory, *Federated Museum Journal*, Volume 21. Museums Department, Kuala Lumpur.
- Evans, I.H.N. 1937. *The Negritos of Malaya*, Cambridge At The University Press.
- Garvan, J.M. 1963, *The Negritos of the Philippines*, Verlag Ferdinand Berger.
- Hamid Mohd Isa & Amir Ahmad, 2011. Orang Laut di Johor: Satu Perspektif Etnografi dan Sejarah, Dalam Mokhtar Saidin & Suprayitno (eds.). *Mengungkap Peradaban Asia Tenggara Melalui Tapak Padang Lawas Sumatera dan Tapak Sungai Batu, Kedah*, Pusat Penyelidikan Arkeologi Global, Universiti Sains Malaysia.
- Maxwell, W. E. 1881. Two Malay Myths: The Princess of the Foam, and the Raja of the Bamboo, *JRAS*, 13.
- Mokhtar, S. 2012. Archaeology: Early Settlements in Seberang Jaya and Penang Island In Muhammad Haji Salleh (ed.) *Early History of Penang*, Penerbit Universiti Sains Malaysia.



- Oppenheimer, S. (2003). *The Real Eve, Modern Man's Journey Out of Africa*. Carroll & Graf Publishers, New York.
- Oppenheimer, S. (2011). *Out of Africa: Peopling of the World and The Origins of Malays*. Seminar Asal Usul Melayu: Induknya di Alam Melayu. Ikatan Ahli Arkeologi Malaysia.
- Pookarjorn, S. 1994. *Final Report of Excavation at Moh Khiew Cave, Krabi Province; Sakai Cave, Trang Province and Ethnoarchaeological Research of Hunter-Gatherer Group Socal Mani or Sakai or Orang Asli at Trang Province*, The Hoabinhian Research Project in Thailand, Volume 2. Department of Archaeology, Silpakorn University, Bangkok.
- Rambo, T. 1979. Primitive Man's Impact on Genetic Resource of Malaysian Tropical Rainforest, *Malaysian Applied Biology*, 8(1).
- Simanjuntak, T., Pojoh, I.H.E., Mohamad Hisyam, 2006. *Austronesia: A Phenomenon of Global Impact in the History of Humanity* IN Simanjuntak, T., Pojoh, I.H.E., & Mohamad Hisyam (eds.) *Austronesian Diaspora And The Ethnogeneses of People in Indonesian Archipelago*, Indonesian Institute of Sciences International Centre for Prehistoric and Austronesian Studies Indonesian National Committee for UNESCO, Jakarta.
- Schebesta, P., 1928. *Among The Forest Dwarfs Of Malaya*. Kuala Lumpur Singapore: Oxford University Press.
- Skeat, W.W. & Blagden, C.O. 1966, *Pagan Races Of The Malay Peninsula*, Vol. Two, Frank Cass & Co. Ltd. London.
- Tomadan Johari, 1976. *Orang Kuala Rengit: Satu Gambaran Umum dengan Penekanan Pada Kegiatan Ekonomi dan Masalah yang Berkaitan dengannya*, Latihan Ilmiah, Universiti Malaya (tidak diterbitkan).
- Wolter, O.W. 1967. *Early Indonesian Commerce: A Study of the Origins of Srivijaya*, Ithaca, Corn University Press.
- <http://www.jakoa.gov.my>, diakses pada 2.05.2012
- <http://www.temiar.com/poasm.html>, diakses pada 2.05.2012
- Temu bual, Serdang Bin Uda, 60 tahun, Penghulu Sungai Tekam, Temenggor, 2 Julai 2010.